

DESA PAKRAMAN PIUN



BANTANG AWIG-AWIG DESA PAKRAMAN PIUN

	Kaca	
MURDHA CITTA	4	
PRATHAMAS SARGAH ARAN LAN WEWIDANGAN	5	
DWITĪYAS SARGAH PATITIS LAN PAMIKUKUH	6	
TRTĪYAS SARGAH SUKERTAN TATA PAKRAMAN	6	
	Palet 1 Indik Krama	6
	Palet 2 Indik Prajuru Desa	11
	Palet 3 Indik Kulkul	13
	Palet 4 Indik Paruman	15
	Palet 5 Indik Druwén Désa	17
	Palet 6 Indik Panyanggran Banjar	18
CATURTHAS SARGAH SUKERTAN TATA AGAMA	18	
	Palet 1 Indik Déwa Yajnya	18
	Palet 2 Indik Resi Yajnya	23
	Palet 3 Indik Pitra Yajnya	24
	Palet 4 Indik Manusa Yajnya	28
	Palet 5 Indik Bhuta Yajnya	29

PAÑCAMAS SARGAH	SUKERTAN TATA PAWONGAN	31
	Palet 1 Indik Pawiwahan	31,
	Palet 2 Indik Nyapihan	32
	Palet 3 Indik Sentana	33
	Palet 4 Indik Warisan	34,
SASŦHAS SARGAH	SUKERTAN TATA PALEMAHAN	35
	Palet 1 Karang, Tegal, lan Carik	35
	Palet 2 Indik Pepayonan	36
	Palet 3 Indik Wewangunan	37
	Palet 4 Indik Wewalungan	38
	Palet 5 indik Indik Bhaya	39
SAPTAMAS SARGAH	WICĀRA LAN PAMIDANDA	41
	Palet 1 Indik Wicāra	41
	Palet 2 Indik Pamidaᅇᅇa	41
AᅇŦAMAS SARGAH	NGUWAH-UWUHIN AWIG-AWIG	43
NAWAMAS SARGAH	SAMĀPTA	44
LEPIHAN : TETINASAN NYĀSA LAN SASANTI		48

MURDHA CITTA

OM AWIGHNAM ASTU NAMO SIDDHAM !

Sembah bakti miwah pangastawan titiang majeng ring paduka Bhaṭāra- Bhaṭarī sesuwunan titiang sami, riantukan wantah malarapan panghyangning kalih paswécan Ida Sang Hyang Widhi Waśa asung kretawarānugraha nyresti jagat jangkep rawuhing sadagingnya sami, mawinan wénten kahuripan sekala niskala ring Bhuwana Agung miwah ring Bhuwana Alit. Manut dresta, Désané kamanggehang dados pasayuban Krama Désa rawuhing kulawarga pawongannya sami, mawastu raris Désané kamanggehang pinaka pawakan Bhuwana Agung, pawongannya kamanggehang pinaka pawakan Bhuwana Alit.

Sotaning pawakan Bhuwana Agung, Désané taler kamanggehang pinaka pawakan bhāwa mahurip, sané kacirénin antuk wéntené pakilit Tri Hita Kāraṇa sané tan dados pasahang, luwiré :

- ha. Parhyangan, inggih punika : sahanan parhyangan panyiwian Désa, genah ngarcana bhāwan Ida Sang Hyang Parama Wiśéśa, pinaka jiwa pramanan Désané;
- na. Pawongan, inggih punika : gebogan Krama rawuhing warga Désa maka sami pawakan Tri Kaya pinaka bāyu pramāṇan Désané, mawinan Désané prasida maolah prawretti;
- ca. Palemahan, inggih punika : sahananing pakarangan, tegal, carik, miwah sétra sakekuwuban Désa Pakraman, pinaka sthūla sariran Désané.

Adung patemoning Bhuwana Agung ring Bhuwana Alit, maka larapan ngupadi śānta jagaddhita, punika sinanggeh murddhaning prayojana pangriptaning awig-awig iki, rikala paséban mami Krama Désa Pakraman Piun pinaka sepat siku-siku pamatut miwah pamutus, wastu kasidan prayojanan mami kabéh, prasama angidep muwah amagehaken linging awig-awig kadi ring sor iki.

PRATHAMAS SARGAH
ARAN LAN WEWIDANGAN DESA

Pawos 1

- (1) Désa Pakraman puniki mawasta Désa Pakraman Piun.
- (2) Jebar kekuwub wewidangannya mawates nyatur désa :
 - ha. Sisi Lor : Jalan Perean - Basangbé;
 - na. Sisi Wetan : Pangkung Embong;
 - ca. Sisi Kidul : Pangkung Embong;
 - ra. Sisi Kulon : Telabah.
- (3) Jebar kekuwub wewidangan sané mawengku antuk wates-wates inucap ring ajeng, kirang langkung wénten 32 Ha.
- (4) Sané kamanggehang ngranjing dados kekuwub wewidangan Désa Pakraman puniki, manut dresta, luwiré :
 - ha. Pupulan karang paumahan sané sinanggeh Palemahan Désa Pakraman;
 - na. Sétra, carik miwah tegal sané wénten ring kekuwub wewidangan Désa Pakraman puniki sajabaning Palemahan Désa Pakraman, manggeh ngranjing dados Telajakan Désa Pakraman Piun.
- (5) Awig-awig, Pararem miwah sahanan Pasuaran Désa, manggeh kajejerang ring jebar kekuwub wewidangan Désa Pakraman puniki sami.

DWITĪYAS SARGAH
PATITIS LAN PAMIKUKUH

Pawos 2

Désa Pakraman Piun ngamanggehang pamikukuh, minakādi :

- (1) Pancasila.
- (2) Undang-Undang Dasar 1945.
- (3) Tri Hita Kāraṇa, manut sadācara Agama Hindu.
- (4) Hak Azasi Manusia utawi HAM.
- (5) Perda Provinsi Bali Indik Desa Pakraman.

Pawos 3

Luwir Patitis Désa Pakraman Piun :

- (1) Mikukuhin miwah ngrajegang Sang Hyang Āgama.
- (2) Nginggilang tata prawrettiné maāgama.
- (3) Ngrajegang kasukertan Désa saha Pawongannya sekala lan niskala.

TRTĪYAS SARGAH
SUKERTAN TATA PAKRAMAN

Palet 1
Indik Krama.

Pawos 4

Sané kabawos Krama Desa, inggih punika :

- (1) Sahananing sang jenek mapaumahan ring wewengkon wewidangan Désa Pakraman Piun, kasinanggeh warga Désa.

(2) Krama Désa inucap ring ajeng, linggihnyané wénten 3 (tigang) soroh :

ha. Krama Désa sané maagama Hindu tur sareng nyungkemin Kahyangan Désa Pakraman Piun, kasinanggeh Krama Désa Pakraman Piun.

na. Krama Désa maagama Hindu sané wantah nyarengin ring Pawongan miwah Palemahan kéwanten, kasinanggeh Krama Tamiu, sané kasulurang manut pararem.

ca. Krama Désa boya maagama Hindu sané wantah nyarengin ring Palemahan kéwanten, kasinanggeh Tamiu sané kasulurang manut pararem.

Pawos 5

Dasar Pakraman :

(1) Sahanan Warga Désa sané sampun marabian, patut ngawit dados Krama Désa.

(2) Satunggil Krama, manut karendahan kulawargannya, patut keni sinalih tunggil ayah-ayah :

ha. Ayahan Ngarep;

na. Ayahan Balu;

ca. Ayahan Pangelé.

(3) Sesengker ngawit tedun ngayah :

ha. Marep ring Krama Désa sané mawit saking pawiwahan tigang sasih saking puput makala-kalaan;

na. Marep ring Krama Désa sané mawit saking ngarangin sané sareng makrama désa, kasulurang manut pararem.

(4) Krama Désa sané wenang nyada yan sampun kapastika, luwiré :

ha. sungkan tahunan;

na. yan sampun maderbé pangentos utawi panyeledii;

ca. risampun mayusa 65 warsa yan tan maderbé panyeledii.

- (5) Sang saking séwosan désa yan sareng tedun makrama désa ring Désa Pakraman Piun, patut keni batu-batu utawi pamogpog, sané agengnyané kasulurang manut pararem.
- (6) Yan wénten krama saking séwosan désa sareng ngranjing makrama désa ring Désa Pakraman Piun, patut kadulurin antuk surat keterangan sané jangkep.

Pawos 6

Wusan dados Krama Désa, luwiré :

- (1) Sangkaning :
 ha. . . séda;
 na. pinunas ngraga, menawi magingsir linggih saking wewengkon Désa Pakraman Piun;
 ca. Katiwakin pamidanda kanorayang, malantaran piwal ring Awig-awig miwah Pararem Krama Désa, utawi tan satinut ring pituduh Prajuru sajeroning indik nyupat sikian, minakadi nénten prasida ngeséhin prawretti;
- (2) Sang wusan dados Krama Désa tan polih pahpahan druwén Désa, sawawaning pahpahan sané mawit saking utsahan Banjar, miwah tan polih pasayuban malih sajeroning ala ayu.
- (3) Tata titiné niténin wusan dados Krama Désa inucap ring ajeng, kasulurang manut Pararem.

Pawos 7

Sahanan Krama Désa, patut keni tetegenan utawi ayah-ayah, luwiré :

- (1). Ayahan Ngarep, mapiteges paturunan, peson-peson miwah ayahan mamungkul saking Krama Ngarep.

(2) Ayahan Balu, luwiré :

ha. Balu rémban, sané pianaknyané kantun alit-alit, punika keni ayahan balu rémban, sané kasulurang manut pararem;

na. Balu ngelintik, keni ayahan balu manut balunnyané, yan lanang keni ayahan lanang, yan istri keni ayahan istri.

(3). Ritatkala ngardi wewangunan marep kabuatan Désa Pakraman, Kramané sajaba keni ayahan manut kecapé ring ajeng, taler keni paturunan sakadi ring sor :

ha. Paturunan sama wibhaga manut pararem;

na. Dana Punia, manut kalascaryan sang madana punia.

(4) Krama Désa, kadadosang :

ha. Mapuangkid utawi tan tedun ngayah / parum :

1). rikala mapawangunān, ngraabin, nangun yajnya, nandur, kaluwasan masengker déwasa;

2). keni dedawuhan saking Guru Wisésa;

3). kapialang, luwiré : sungkan, matepetin, kalayusekaran, lan sakancan punika.

na. Dados ngwakilang ring jadmā tiosan, sané sampun menék daa/truna, miñakadi sampun mayusa 16 warsa ngunggahang;

ca. Dados ngampel utawi numbas ayahan, pradé :

1). dados Pegawai Negeri utawi Pegawai Perusahaan Swasta;

2). magenah ring désa séwosan malantaran ngrereh pakaryan.

ra. Dados nyeledii utawi nyuksukin Krama Ngarep yan sampun mayusa 16 warsa.

Pawos 8

Kapatutan Krama Tamiu lan Tamiu :

- (1) Krama Tamiu lan Tamiu, patut madana punia ring Desa/Bañjar Pakraman, manut pararem.
- (2). Krama Tamiu lan Tamiu , patut polih pasayuban marupa pamitulung rikeñjekan katibén pañcabhaya.

Pawos 9

Paturunan miwah Leluputan :

Paturunan utawi peson-peson Krama Desa sajeroning ngupadi kasukertan Desa, kasulurang :

- (1) Paturunan miwah peson-peson sajeroning ngulati kasukertan Desa Pakraman, kapitegenang ring Krama Desa Pakraman.
- (2) - Désa Pakraman, wenang mawéh leluputan ayahan miwah peson-peson ring sang inggiling linggih miwah sang kawelasarsan.
- (3) Sor singgih leluputan miwah bacakan sang polih leluputan, kaungghang sajeroning Pararem.
- (4) Sajawaning Prajuru Desa Pakraman, sané taler pastika polih leluputan, luwiré :

ha. para sadhaka, minakādi Pamangku Kahyangan / Panyiwian Désa, lan panyada;

na. para serati lan sutri ;

ca. sang sungkan tahunan tan kenéng tinamban;

ra. wong cédāngga banget;

ka. wong ubuh mémé bapa, jantos mayusa 21 warsa utawi sampun mawiwaha.

da. Ageng alit leluputan inucap manut pararem.

Palet 2

Indik Prajuru Désa

Pawos 10

- (1) Désa Pakraman Piun kaénter antuk Prajuru Désa Pakraman, kamanggala antuk Bendésa Adat.
- (2) Prajuru Désa Pakraman, patut :
 - ha. mawit saking Krama Ngarep;
 - na. kaadegang Prajuru malantaran antuk pamilihan jeroning Paruman Krama Désa Pakraman, nyabran 5 (limang) warsa, sajawaning wénten pariindikan tios, tur sang sampun puputing panumaya kéngin kapilih malih;
 - ca. maduluran atur piuning ring Pura / Kahyangan Desa.

Pawos 11

- (1) Bendésa Adat, karombo antuk :
 - ha. Patajuh, pinaka Wakil Bendésa Adat;
 - na. Panyarikan, pinaka Juru Surat;
 - ca. Patengen, pinaka Pangemong Druwén Désa;
 - ra. Kasinoman, pinaka Juru Gumeñcang.
- (2) Sajeroning ngénterang kasukertan ka niskala, Bendésa Adat, patut misinggihang Pamangku Kahyangan Désa.

Pawos 12

- (1) Swadharmaning Bendésa Adat, luwiré :

- ha. Ngénterang paruman-paruman Désa Pakraman;
 - na. Ngénterang panglaksanaan sadaging Awig-awig miwah pamutus-pamutus Krama Désa, sané sinanggeh Pararem;
 - ca. Ngraksa miwah nudonang tata-titiné migunayang sarajabrana druwén Désa;
 - ra. Nuntun saha ngénterang Krama Désa rawuhing warga Désa sami, ngupadi kasukertan sekala lan niskala;
 - ka. Nuntun saha nyaksi upacara sangaskaraning kahuripan sané mabuat, minakadi sané ngilitang sultur pakulawargan;
 - da. Nuntun saha ngénterang Warga Désa, nginggilang Sang Hyang Agama, kasucian Kahyangan, kasucian Palemahan, kasucian Pawongan, miwah tata-titiné migunayang Sétra, manut pararem;
 - ta. Nepasin utawi mawosin miwah niwakang pamutus marep ring wicāran Warga Désa;
 - sa. Ngwakilin Désa Pakraman, matemuang bebawos ring sapasira ugi;
 - la. Lan sané séwosan sané wénten pakilitnya ring Désa Pakraman.
- (2) Tata-titiné nglaksanayang swadharma inucap ring ajeng, tan maren patut satinut ring daging Awig-awig, Pararem, dresta miwah Pamutus Paruman Krama Désa Pakraman.
 - (3) Panglaksanaané ring ajeng patut kasiarang ring Désa Pakraman, kapungkuripun.
 - (4) Sumakuta utawi sumanggup natak Pamutus Paruman Krama Désa Pakraman, ngeninin swadharman sowang-sowang Prajuru.

Pawos 13

Patias utawi olih-olihan Prajuru Désa Pakraman, luwiré :

- ha. luput reramon utawi peson-peson;
- na. luput paturunan marep ring kabuatan Désa Pakraman;

- ca. polih tanding tengah;
- ra. patias séwosan manut Pararem.

Pawos 14

- (1) Prajuru Désa Pakraman, kapilih nyabran 5 warsa, ngawit saking padéwasané kaadegang Prajuru Désa Pakraman.
- (2) Prajuru Désa Pakraman sané swadharmannya sampun puputing sengker, kéngin kapilih malih.
- (3) Pariindikané ngadegang Prajuru Désa Pakraman sakaluwuré, kapastikayang malarapan Paruman Krama Désa Pakraman tur kaingkupin antuk Krama.
- (4) Wusan dados Prajuru Désa Pakraman, sangkaning :
 - ha. lina;
 - na. pinunas ngraga malantaran jalaran sané pastika;
 - ca. swadharmannya sampun puputing sengker;
 - ra. kawusanang olih Krama Désa duaning piwal ring daging awig-awig utawi nilar sesana.
- (5) Ngentosin utawi nguwasanang Prajuru Désa Pakraman, patut kamargiang sajeroning Paruman Krama Désa Pakraman tur kaingkupin antuk pinih kedik kalih pah tiga saking gebogan Krama Désa.

Palet 3 Indik Kulkul

Pawos 15

- (1) Dudonan kulkul ring Désa Pakraman Piun, luwuré :
 - ha. Kulkul Désa;
 - na. Kulkul Bañjar;
 - ca. Kulkul Sekaa-sekaa.

- (2) Kulkul Désa utawi Bañjar Pakraman, kamanggehang pinaka piranti utawi sarana tengeran maka wangsit, ring wewengkon wewidangan Désa utawi Bañjar Pakraman.
- (3) Tetepakan kulkul manut dresta, tur anggah-ungguh tetepakanipun kaunggahang sajeroning Pararem.

Pawos 16

- (1) Kulkul Désa utawi Bañjar Pakraman, tan wenang katepak yan tan sangkaning pituduh Prajuru, sajawaning tengeran kapañcabhayan.
- (2) Sang nepak Kulkul Désa utawi Banjar Pakraman, tan sangkaning pituduh Prajuru, patut digelis atur supéksa maka buatan panepaké; yan piwal, sang mamurug wenang katibakin danda, manut Pararem.
- (3) Sahanan Kulkul Banjaré patut nyarengin katepak, pradé wénten amuk bhaya pati.
- (4) Tabuh tetepakan kulkul Banjaré kapastikayang maséwosan manut kabuatan, sané kasulurang ring pararem, sakadi :
 - ha. Tengeran upacara yajnya;
 - na. Tengeran ngawit nglaksanayang pakaryan sakadi sané sampun kaarahang utawi kasiarang;
 - ca. Tengeran sinalih tunggil warga désa séda;
 - ra. Tengeran wong kapelegandang;
 - ka. Tengeran wong désa kamalingan;
 - da. Tengeran wong désa kabégal, kaamuk, geni bhaya, miwah bhaya sané séwosan.
- (5) Kulkul Sekaa-sekaa miwah kulkul pondokan-pondokan, tan kalugra nyawerin utawi matehin sukat miwah tetepakan Kulkul Désa utawi Bañjar Pakraman; pradé mamurug, sang mamurug taler wenang katibakin danda, manut Pararem.

Palet 4

Indik Paruman

Pawos 17

- (1) Dudonan Paruman ring Désa Pakraman Piun, luwiré :
- ha. Paruman Krama Désa, kawéntenang sanistannya apisan jeroning awarsa utawi manut kabuatan, sané karihinin antuk tetibak arah-arah;
 - na. Paruman Padgatakala, réhning wénten indik sané dahat mabuat sané pacang kabawosang, sané karihinin antuk tetibak arah-arah;
 - ca. Paruman Krama Banjar kawéntenang nyabran sasih nénten majalaran arah-arah malih, duaning sampun maderbé tegak sangkepan sané pastika, manut Pararem ring Banjar;
 - ra. Paruman Prajuru, kawéntenang manut kabuatan;
 - ka. Paruman Sekaa-sekaa, kawéntenang manut kabuatan.
- (2) Paindikan Paruman Désa utawi Banjar Pakraman, patut nganutin dudonan :
- ha. Paruman wahu kéngin kakawitin sasampuné katedunin antuk pinih kedik kalih pah tiga lintang adiri saking sang patut ngamiletin Paruman, kamanggala antuk tengeran suaran kulkul, mabusana adat Bali, tan kalugra makta gegawan sakaluwiré, karihinin antuk ngarcana Bhagawān Panyarikan, majalaran widhi widhana lan cané;
 - na. Maka pangawit, kalaksanayang panyacak pangesép, karuntutin antuk nyacak dedosan, wahu kalanturang antuk parum; sasampun parumané puput, patut kacacak malih, tur sané kasép, sang ninggal paruman miwah sané nosa, wenang katibakin danda, sané ageng alitipun, kasulurang manut Pararem;
 - ca. Maka pamastika wahu kéngin nyacak pangesép, kasulurang manut Pararem;

- ra. Sajeroning paruman tan kalugra ngwetuang wak ghora minakadi ngardi biota; sang mamurug, wenang keni pamidanda bea pacamil, sakadi dandaning anguman-uman ring paséban, sané kasulurang manut Pararem;
- ka. Pamutus bebawos sané briuk sapanggul utawi ingkup, punika sané kaaptiang tur kamanggehang; pradé nénten prasida, pamutus bebawosé mangda kacumponin antuk pinih kedik kalih pah tiga lintang saking sang ngamiletin peparuman.
- (3) Pradé daging peparumané nénten kaingkupin, Prajuru Désa utawi Bañjar Pakraman mangda ngilikang bebawos, saha pamutusnya mangda kararemin antuk Krama Désa utawi Bañjar Pakraman, bilih jantos ping tiga taler nénten prasida kaingkupin, Prajuru Désa utawi Bañjar Pakraman, mangda nunasang indiké punika ring Sang Maraga Guru Wisésa.

Pawos 18

- (1) Sajeroning Paruman Krama Désa, Bendésa Adat patut nyiarang pamarginé ngénterang Désa, pamékas ngeninin indik :
 - ha. Muñjuk lungsuring gebogan pakraman saha ayah-ayahnyané, minakadi sulur arthabrana druwén Désa Pakraman;
 - na. Pangreñcanan Prajuru, ngeninin utsahan Désané kapungkur.
- (2) Pamutus Paruman Krama Désa sané sinanggeh Pararem, kamanggehang maka pamitegep panglaksanaan Awig-awig.

Pawos 19

- (1) Paruman Prajuru Désa Pakraman, kawenangang wantah ngrincikang pangreñcana marep ring utsahan Désané kapungkur.

- (2) Paruman Prajuru Désa Pakraman, tan kawenang ngamedalang tetegenan ring Krama Désa, sadéréngé kaingkupin antuk Krama Désa.
- (3) Pamutus Paruman Prajurit, kéngin ngwetuang pasuara manut daging pituduh sang ngawa rāt, utawi ngoné kang pamutus sané pecak sampun dados Pararem Krama Désa.

Palet 5

Indik Druwén Désa

Pawos 20

- (1) Sané kamanggehang dados druwén Désa Pakraman Piun, luwiré :
 - ha. Kahyangan Tiga : Pura Désa, Pura Puseh, Pura Dalem jangkep lan Prajapati.
 - na. Kahyangan druwén Désa séwosan ring Kahyangan Tiga, minakadi : Pura Luhur Pucak Gunung Agung lan Luhur Pucak Batukaru, Pura Melanting, lan sané séwosan.
 - ca. Lekita-lekita : Pipil utawi Sertipikat tanah druwén Désa, Balé Banjar, Awig-awig, Pasuara, Pararem.
 - ra. Lelanguan minakadi : Tetabuhan lan ilén-ilén druwén Désa, luwiré :
 - 1). Angklung abarung;
 - 2). Ilén-ilén ring pura sowang-sowang.
- (2) Olih-olihan Désa Pakraman Piun mawit saking :
 - ha. Paturunan saking Krama Désa;
 - na. Paica saking Guru Wisésa;
 - ca. Saking palaba désa;
 - ra. Dana punia tiyosan sané patut;
- (3) Sanangken Paruman Krama Désa, Bendésa Adat patut nyiarang muñjuk lungsur olih-olihan sané sinanggeh druwén Désa.

- (4) Olih-olihan druwen Désa, kaanggén prabéa piodalan miwah wewangunan ring pura, taler prabéa tiosan marep ring kabuatan Désa Pakraman.
- (5) Sakaluwiring druwen Désa patut wénten lekitannya sané pastika.
- (6). Tan kalugra ngadol utawi ngésahang druwen Désa yan tan kacumponin antuk Krama Désa sami.

Palet 6

Indik Panyanggran Banjar

Pawos 21

- (1) Krama Banjar ring wewengkon Desa Pakraman Piun, patut sareng nyanggra karya suka duka.
- (2) Tetibak panyanggrané inucap ring ajeng, kasulurang manut Pararem.
- (3) Sowang-sowang Krama Banjar sané pacang nangun karya suka duka sané mabuat, mangda masadok ring Prajuru.

CATURTHAS SARGAH

SUKERTAN TATA AGAMA

Palet 1

Indik Déwa Yajnya.

Pawos 22

- (1) Kahyangan-kahyangan panyiwian Krama Désa Pakraman Piun, luwiré :
 - ha. Kahyangan Tiga : Pura Désa/Baléagung, Pura Puseh, Pura Dalem;
 - na. Kahyangan-kahyangan panyiwian Krama Désa tiosan ring Kahyangan Tiga : Pura Luhur Pucak Gunung Agung lan Luhur Pucak Batukaru, Pura Melanting lan Pura Prajapati.

(2) Tegak piodalan ring sowang-sowang kahyangan inucap ring ajeng, kamanggehang sakadi ring sor puniki :

ha. Pura Puseh lan Pura Désa/Balé Agung, ring rahina Buda, Kliwon, wuku Ugu.

na. Pura Dalem lan Prajapati, ring rahina Anggara, Kliwon, wuku Julungwangi.

ca. Pura Luhur Pucak Gunung Agung lan Luhur Pucak Batukaru, ring rahina Buda, Umanis, wuku Medangsia.

ra. Pura Melanting ring rahina Saniscara, Kliwon, wuku Wariga.

(3) Pamargin pangaciné ring sowang-sowang kahyangan ring ajeng, manut kecap sastra agama, saha kalaksanayang kanista, madhyama, utama, manut kawéntenan krama sané kaingkupin jeroning pararem.

Pawos 23

(1) Ring sowang-sowang pura inucap ring ajeng, patut kaadegang Pamangku.

(2) Pidabdabé ngadegang Pamangku, nganutin dudonan :

ha. ngwilang saking turunan utawi ngwaris;

na. malantaran nyanjan utawi nuhur ring pura sané karerehang Pamangku;

ca. malantaran kapilih antuk Krama Désa.

(3) Sang tan-wenang kaadegang dados Pamangku, luwiré :

ha. cédāngga, luwire : pécéng, pérot, cungih lan sapanunggalannya;

na. sapa sira ugi sané nénten kapatutang manut pararem;

ca. nandang sakit ila, ayan, buduh miwah pinungkan sané tan kenéng tinamban;

ra. sang maderbé parilaksana nénten becik.

(4) Prabéa Kapamangkuan :

- ha. prabéa adiksa widhi utawi ngwintenang Pamangku, kamedalin miwah kalaksanayang antuk Krama Désa.
 - na. marep ring prabéan pitra yajnya ring Pamangku Kahyangan druwen Désa, yan séda ri wekas, Krama Désané patut mawéh dana punia atiwa-tiwa, manut Pararem.
- (5) Pamangku, patut ngamanggehang sesana miwah agem-ageman Pamangku.

Pawos 24

Swadharmaning Pamangku :

- ha. ngénterang upacara piodalan ring kahyangan sané kaempon utawi ring pakubon sowang-sowang krama;
- na. pradé sinalih tunggil Pamangku Kahyangan Désa kapialang utawi cuntaka, rikala piodalan ring pura sané kaempon, kéngin nyelang Pamangku Kahyangan Désa tiosan sané wénten ring wewengkon Désa Pakraman Piun, utawi nuhur sang sulinggih, katiténin antuk Prajuru;
- ca. yan Pamangku kalayusekaran, wenang anglepas swadharma, kasulurang manut Pararem;
- ra. yan Pamangku sampun tigang rahina ngayah ring pura sané kaempon, kancit wénten kulawaragannya kalayusekaran, Pamangku inucap tan kenéng cuntaka, sakéwanten nénten kengin budal salamin piodalan;
- ka. mungguh tedun ring palinggih-palinggih Kahyangan Désa miwah ngiyasin pralingga-pralingga;
- da. ngrajegang sesanan Pamangku.

Pawos 25

Patias utawi olih-olihan Pamangku, luwiré :

- ha. panyolasan miwah sarin canang rikala muput yajnya ring sowang-sowang pakubon krama;
- na. luput pakaryan miwah reramon;
- ca. polih apahtigan sarin canang rikala wénten aci ring kahyangan sané kaemponin;
- ra. luput saluwiring prabéan wewangunan ring kahyangan sané kaemponin.
- ka. Patias lan olih-olihan sané séwosan manut pararem.

Pawos 26

(1) Pamangku kagentosin, riantukan :

- ha. séda;
- na. pinunas ngraga, menawi kageringan lan sapanunggilannya;
- ca. kawusanang antuk Krama, riantukan nilar sesanan Pamangku.

(2) Tatacarané ngadegang miwah ngentosin Pamangku, kasulurang manut Pararem.

Pawos 27

Indik kasukertan Kahyangan, kadudonang sakadi ring sor puniki :

(1) Sané nénten kalugra ngranjing ka Pura, luwiré :

- ha. Sang katiban cuntaka, minakadi sebel ngraga :
 - 1). sebel kandel ngrajaswala, salami dérèng mabresih;
 - 2). sebel antuk ngembasang putra, salami 42 rahina, pateh ring sang karuron;
 - 3). sebel panganténan, sadérèng mabiakala utawi makala-kalaan;

- 4). sebel riantukan kalayusekaran, jantos puputing sengker sané kaingkupin jeroning Pararem.
 - na. Makta sahananing bebaktan sané sinanggeh ngletehin, manut kecap sastra agama.
 - ca. Sato agung minakadi wewalungan suku pat, sawawaning rikala mapepada.
 - ra. Anak alit sadéréng mayusa tigang sasih;
 - ka. Mabusana sané tan manut kadi tatacaraning ngranjing ka pura, sadéréng polih wak-wakan utawi pituduh saking Prajuru Désa Pakraman.
- (2) Tata busanané ngranjing ka pura, kasulurang manut Pararem.
- (3) Pratingkahé tan wenang ring Pura, luwiré :
 - ha. masumpah utawi macoran, sawawaning wit saking pituduh Prajuru Désa Pakraman;
 - na. ngamedalang wak parusya utawi wak capala;
 - ca. mabanyu, makoratan, masesenengan, makolem dados asiki lanang wadon, nyangsang busana;
 - ra. ngias raga minakadi menahang wastra, menahang pusungan lan sakancan punika, sawawaning sang sulinggih miwah pinandita;
 - ka. masusuin anak alit.
- (4) Séwosan ring Pamangku tan kalugra mungguh tedun ring palinggih-palinggih, sawawaning wit saking pituduh Prajuru Désa Pakraman.
- (5) Sang mamurug kecapé ring ajeng, wenang keni déwa danda, sané kasulurang manut Pararem.

Pawos 28

- (1) Yan wénten jadma karawuhan ring pura boya sangkaning nyanjan tur ngawinang kramané biapara, wenang keni déwa danda lan artha danda, sané kasulurang manut Pararem.

- (2) Pradé Kahyangan Désané kahanan durmanggala minakadi kapancabhayan, Pamangku patut digelis masadok ring Prajuru Désa Pakraman.
- (3) Indik upakara/upacara pamahayun kadurmanggala Kahyangan Désa, mapagamel kecap sastra agama, sané kasungkemin olih Krama Désa.

Palet 2

Indik Resi Yajnya.

Pawos 29

- (1) Sang pacang madeg sulinggih utawi madwijati patut masadok ring Prajuru Désa Pakraman miwah Parisada Hindu Dharma Indonesia.
- (2) Prajuru Désa Pakraman patut ngawas lan niténin tur wenang mialangin, pradé kacihnan wénten indik sané tan manut kecap sastra agama, tur sareng nyaksi upakara/upacara padwijatiannya, saha nglantur nyiarang sajeroning Paruman Krama Désa tegap rauhing wates kawenangannya muput yajnya.
- (3) Krama Désa patut madana punia sapamadeg miwah ring panglepas Sang Sulinggih riwekas, katuntun antuk Prajuru Désa.
- (4) Sang Sulinggih wenang polih leluputan ayahan miwah peson-peson manut pararem.

Pawos 30

- (1) Sajeroning muput yajnya, Sang Sulinggih patut ngutamayang muput yajnya ring wewengkon Désa Pakraman Piun, sasampuné puput, wahu muput yajnya ring wewengkon désa tiosan utawi ka dura désa.
- (2) Krama Désané sami, patut sareng ngawas lan niténin katuntun antuk Prajuru, mangda sahanan yajnya sané kalaksanayang olih sowang-sawang Krama Désa, kapuput olih Sulinggih utawi Pinandita, manut kawenangannya sowang-sawang.

Palet 3

Indik Pitra Yajnya.

Pawos 31

- (1) Désa Pakraman Piun, patut sareng nyanggra yan wénten sinalih tunggil krama sané nglaksanayang upacara Pitra Yajnya.
- (2) Tatacara panyanggrané inucap ring ajeng kasulurang manut Pararem.
- (3) Dudonan pamargin Pitra Yajnya :
 - ha. majalaran mendem utawi ngeseng, maka cihna makingsan ring Prèthiwi utawi makingsan ring Geni, pinaka dharana antos nuptupang prabéa;
 - na. majalaran upacara pangabénan utawi palebon;
 - ca. riwusan ngabén, patut kalanturang malih antuk upacara ngrorasin (mamukur) tur karuntutin malih antuk nglinggihang déwa pitara.

Pawos 32

- (1) Sinalih tunggil krama sané kalayusekaran/atiwa-tiwa, mangda masadok ring Prajuru.
- (2) Swadharmaning Désa/Banjar :
 - ha. Kelihan Banjar/Kelihan Adat, patut maritatas sang kaduhkitan, napiké sawané pacang kapendem, makingsan ring Geni utawi lantur kaabénang;
 - na. Yan sampun pastika, Kelihan Adat raris nepak kulkul tengeran kalayusekaran;
 - ca. Pradé kapendem, panyanggran Krama Banjar salanturnya manut sakadi sané sampun kaunggahang jeroning Pararem, jantos pependemané puput;
 - ra. Pradé makingsan ring Geni, panyanggran Krama Banjar salanturnya, manut kadi daging Pararem, jantos pamargin upacarané puput;
 - ka. Pradé kaabénang, panyanggran Krama Banjar salanturnya, manut kadi daging Pararem, jantos pamargin upacarané puput.

- (3) Tan kalugra nginepang bangbang.
- (4) Désané mawéh galah ring sang kalayusekaran sajeroning pitung rahina kengin atiwa-tiwa, sawaning wénten kabuatan tios saking sang yajamana.
- (5) Larangan pependeman miwah palebon ring wewengkon Désa Pakraman Piun, kaunggahang sajeroning Pararem.
- (6) Pradé wénten kalayusekaran rikala piodalan ring Kahyangan Désa, kengin mendem tan pasadok, tur patut ngrereh galah mamargi rikala wengi.

Pawos 33

- (1) Désa Pakraman Piun, ngamanggehang indik cuntaka, mapagamel ring Pamutus Mahasabha Parisada Hindu Dharma Indonésia.
- (2) Tatacarané nyulurang kacuntakan, mapagamel kecap sastra agama, kaanutang ring drestan désa, sané kaingkupin jeroning Pararem.
- (3) Sinalih tunggil krama sané kahanan cuntaka, yan durung utas, tan kalugra nyarubin genah suci druwén Désa miwah druwén sowang-sowang krama.
- (4) Sang mamurug, patut keni déwa danda, manut Pararem.
- (5) Sengker utas cuntaka manut kawéntenannya, kasulurang sakadi ring sor puniki :

ha. Kalayusekaran, cuntakannya kaanutang ring drestan désa miwah sastra dresta, kasulurang manut pararem;

na. Ngrajaswala, cuntakannya tigang rahina ngawit saking ngrajaswala, utawi salamin ngrajaswala;

ca. Ngembasang putra, abulan pitung rahina ngawit saking putrané embas, ngantos katiwakin upakara/upacara tutug kambuhan;

ra. Karuron, cuntakannya abulan pitung rahina ngawit saking karuron, ngantos katiwakin tirtha pamrayascitta;

- ka. Pawiwahan, cuntakannya ngantos sampun makala-kalaan;
- da. Gamia gamana, cuntakannya ngantos sampun kapalasang, karuntutin antuk mrayascitta sikian, Désa Pakraman miwah Kahyangan Désa;
- ta. Salah timpal, cuntakannya kapuputang manut kecap sastra agama miwah drestan désa;
- sa. Anak istri mobot malantaran lokika sanggraha kandugi nénten katiwakin upakara/upacara pabiakawonan, cuntakannya ngantos katiwakin upakara/upacara pabiakawonan;
- wa. Anak istri ngembasang putra malantaran lokika sanggraha kandugi pecak nénten katiwakin upakara/upacara pabiakawonan miwah widhi widhana, cuntakannya ngantos wénten meras anaké alit, karuntutin antuk upakara/upacara manut kecap sastra agama;
- la. Mamitra ngalang, cuntakannya ngantos katiwakin upakara/upacara pabiakawonan;
- ma. Ṣaḍ ātatāyī, cuntakannya ngantos sampun mrayascitta sikian miwah ngeséhin prawreti.

(6) Cuntaka kalayusekaran/kapademan :

ha. Kapendem, cuntakannya :

- 1). cuntaka ka Banjar, laminipun tigang rahina ngawit saking wusan mendem, ngantos sampun maprayascitta (masepuh);
- 2). kulawargannya sajeroning pakarangan riwusan ngrorasin.
- 3). yan wénten anak alit sadurung ketus gigi kalayusekaran, cuntakannya salami abulan pitung rahina.

na. Kaabénang, cuntakannya :

- 1). cuntaka ka Banjar, manut dresta sané kapikukuh antuk Pararem;

- 2). cuntakan sang nyambut karya pitra yajnya, manut dresta sané kapikukuh antuk Pararem.

(7) Sang katiban cuntaka, luwiré :

ha. Kalayusekaran, sané cuntaka :

- 1). sang kalayusekaran;
- 2). kulawargannya;
- 3). bebanjarannya;

na. Ngrajaswala, sané cuntaka : sang ngrajaswala punika;

ca. Ngembasang putra, sané cuntaka : sang maderbé putra lanang wiadin istri, utawi yayah rénan sang wahu embas;

ra. Pawiwahan, sané cuntaka : sang mawiwaha lanang wiadin istri, utawi dampati lanang istri;

ka. Karuron, sané cuntaka : sang karuron;

da. Gamia gamana, sané cuntaka :

- 1). sang nglaksanayang gamia gamana;
- 2). Désa Pakramannyané;

ta. Salah timpal, sané cuntaka :

- 1). sang nglaksanayang salah timpal;
- 2). Désa Pakramannyané;

sa. Anak istri mobot malantaran lokika sanggraha kandugi pecak nénten katiwakin upakara/upacara pabiakawonan, sané cuntaka : anaké istri sané mobot punika;

wa. Anak istri ngembasang putra malantaran lokika sanggraha kandugi pecak nénten katiwakin upakara/upacara pabiakawonan miwah widhi widhana, sané cuntaka :

- 1). sang ngembasang putra;

2). putrané sané kaembasang;

la. Mamitra ngalang, sané cuntaka : sang nglaksanayang mamitra ngalang punika;

ma. Şad ātatāyī, sané cuntaka : sang nglaksanayang şad ātatāyī punika.

(8) Sang tan kenéng cuntaka, luwiré :

ha. Sang Sulinggih;

na. Pamangku Kahyangan Tiga rikala piodalan tur sampun ngayah tigang rahina ring pura sané kaemponin utawi sampun ngalang sasih utawi ngalang tengah.

Pawos 34

(1) Pamargin atiwa-tiwa utawi pangabénan kalaksanayang mapagamel kecap sastra agama miwah drestan désa.

(2) Peputusan pangabénan, kasulurang manut Pararem.

(3) Panginguné ring Krama Banjar, kasulurang manut Pararem.

Palet 4

Indik Manusa Yajnya.

Pawos 35

(1) Krama Désa minakadi Krama Banjar, patut sareng nyanggara miwah niténin yan wénten sinalih tunggil krama nglaksanayang upacara Manusa Yajnya sané mabuat.

(2) Tatacara panyanggrané inucap ring ajeng kasulurang manut Pararem.

(3) Sang pacang nglaksanayang upacara Manusa Yajnya sané mabuat, mangda masadok ring Prajuru.

(4) Manusa Yajnya inggih punika, upacara-upacara dharmaning kahuripan manusa, ngawit saking patemoning kama bang lan kama petak sajeroning garbha, ngantos kalayusekaran ri wekas. Upacara inucap kadudonang sakadi ring sor puniki :

- ha. Magedong-gedongan;
- na. Sang rare wahu embas;
- ca. Kepus udel;
- ra. Tutug roras rahina;
- ka. Tutug kambuhan;
- da. Tigang sasihan;
- ta. Pawetuan / oton / odalan;
- sa. Tutug kelih / Ngraja swala;
- wa. Matatah / mapandes;
- la. Pawiwahan;
- ma. Mawinten;

- (5) Upacara-upacara inucap ring ajeng kamargiang kanista, madhyama, utama, manut kecap sastra agama miwah dresta.

Palet 5

Indik Bhuta Yajnya.

Pawos 36

- (1) Désa Pakraman Piun patut nyanggra pamargin Bhuta Yajnya, marep ring kabuatan Désa Pakraman Piun.
- (2) Pidabdab pamargin Bhuta Yajnya inucap ring ajeng, mapagamel kecap sastra agama, kaanutang ring drestan Désa, sané kapikukuh antuk Pararem.
- (3) Krama Désa minakadi Krama Banjar patut sareng nyanggra yan wénten sinalih tunggil krama sané nglaksanayang upacara Bhuta Yajnya sané mabuat.
- (4) Sang pacang nglaksanayang upacara Bhuta Yajnya sané mabuat, mangda masadok ring Prajuru.

- (1) Bhuta Yajnya marep ring kabuatan Désa Pakraman minakadi carun sasih miwah sané lianan, kasulurang manut Pararem.
- (2) Indik pamargin palelastian utawi makiyis, kasulurang manut Pararem.
- (3) Nangken warsa, rikalaning Tilem Sasih Kasanga, patut kalaksanayang Tawur Kasanga, kalanturang antuk Pangrupukan, pinaka cihna nyanggra pangrawuh Nawa Saka Warsa (Tahun Baru Saka), ring pananggal apisan Sasih Kadasa, sané kawastanin Nyepi.
- (4) Rikalaning Nyepi, sowang-sowang Krama Désa patut ngamargiang Catur Brata Panyepian, inggih punika :

ha.	amati geni	:	tan kéngin maapi-api;
na.	amati karya	:	tan kéngin nyambut karya;
ca.	amati lelungan	:	tan kéngin malelungayan mrika-mriki;
ra.	amati lelangwan	:	tan kéngin maoneng-onengan, ngwijil ang suara ghora, nabuh gegambelan, lan sakancannya.
- (5) Catur Brata Panyepian punika kamargiang saking semeng jantos Bénjangné ngedas rahina.
- (6) Mangda pamargin Catur Brata Panyepian punika trepti, patut katilikin antuk tetelik Désa sané kawastanin Pacalang Désa, tur sang mamurug patut katiwakin pamidanda, sané kasulurang manut Pararem.
- (7) Bénjangné ring pananggal ping kalih Sasih Kadasa, kawastanin Ngembak Geni, sowang-sowang krama patut saling ngaksamayang sané kawastanin Dharma Santi.

PAÑCAMAS SARGAH
SUKERTAN TATA PAWONGAN

Palet 1

Indik Pawiwahan.

Pawos 38

- (1) Pawiwāhan, inggih punika patemoning purusa lawan pradhana, malarapan panunggalan kayun suka cita kadulurin upasaksi sekalaniskala.
- (2) Pamargin Pawiwāhan, luwiré :
 - ha. Pepadikan, kamanggala antuk pakrunan;
 - na. Ngrorod, marangkat riin wahu kakrunayang;
 - ca. Nyeburin utawi nyentana nyeburin;
 - ra. Sang nyeburin utawi nyentana nénten kapatutang ngambil istri mingkalihang, sajawaning sampun polih pamutus saking kulawarga.
- (3) Pidabdab sang pacang mawiwaha patut :
 - ha. Sampun manggeh daa-truna;
 - na. Sangkaning pada arsa (tan kapaksa).
 - ca. Kadulurin upacara sudi wadani, pradé ngambil anak matiosan agama;
- (4) Pamargin pawiwahan mangda nganutin Undang-undang indik Pawiwahan saking sang ngawawenang.
- (5) Pawiwahan sané kapatutang ring Desa Pakraman Piun, kasulurang manut pararem.
- (6) Pawiwahan sané tan manut kadi kecapé ring ajeng, sinanggeh pawiwahan tan pastika.
- (7) Sapasira ugi pacang ngwarangang pakulawargan patut masadok ring Prajuru, salanturnya Prajuru maritatasang manut tan manut indik parabiané.
- (8) Pamargin pepadikan, kaunggahang ring pararem.
- (9) Pradé ngrorod utawi marangkat, patut :

- ha. Reraman lanangé ngwéntenang panglukuan / pajati antuk duta saksi paling kedik 2 (kalih) diri;
 - na. Anténé tan kéngin nginep ring pakubon sang lanang sadéréng mabiakala.
- (10). Sajeroning pakrunan / panglukuan, patut :
- ha. Kamanggala sakéng reraman purusané antuk nglungsur geng pangampura majeng ring reraman wadoné;
 - na. Kaiguman bebawos indik idih pakidih utawi palegan reraman wadoné marep ring paséwakan sang ngidih miwah dewasa pakerabkambeannya ri wekas;
 - ca. Kacihnayang indik kapurusa yan pradé sentana rajegé kajejerang, kapatutang ngedih anak lanang sané kabawos pawiwahan nyeburin, tur ri sampun sulur pamerasané kategepin, raris kamanggehang dados sentana nyeburin;
 - ra. Pradé panglukuan pajatiné tan katerima, pakrunan kamargiang jantos ping tiga.
- (11). Pakerabkambean mapiteges upacara galang apadang (puput) mapikuren, duaning sampun manut sakadi dudonannyané manut sastra agama lan dresta.

Palet 2

Indik Nyapihan.

Pawos 39

- (1) Prajuru Désa minakadi Prajuru Banjar Pakraman, wenang sareng mawosin miwah niténin yan wénten sinalih tunggil krama sané mapikarsa pacang palas marabi, mangda nénten kadurusan dados Nyapihan.
- (2) Yan krama inucap kukuh ring pikarsannya, Désa minakadi Banjar Pakraman, nénten sumakuta ring pamarginnya.
- (3). Palas marabian inggih punika indik palas sané mawit sangkaning wicara.
- (4) Sang ayat palas marabian patut atur supeksa palikitan riyin ring sang rumawos

(Pengadilan Negeri) wastu tinas apadang kabawos Nyapihan, wahu I Prajuru nyiyarang kawéntenannyané ring désa.

- (5) Tatacara palas marabian nganutin dudonan sakadi ring sor :
- ha. Nahur prabéa pasaksi sinalih tunggil sami matenga;
 - na. Pagunakayan polih pahan pda;
 - ca. Pabekel, tadtadan sowang-sowang, kakuasayang niri-niri, sakéwanten indik warisan kakuasayang antuk purusa;
 - ra. Ngariwuwu miwah ngupajiwa pratisentana manut swadharmaning guru rupaka;
 - ka. Nahur pamidanda panumbas suaran kulkul manut pararem utawi manut dresta.
 - da. Mapamit saking mrajan sang lanang / purusa.
- (6) Pradé ri wekas sang palas marabian punika kacihnán adung malih, patut ngamargiang upacara pawiwahan malih.

Palet 3
Indik Sentana

Pawos 40

- (1) Prajuru minakadi Prajuru Banjar Pakraman, wenang sareng mawosin miwah niténin yan wénten sinalih tunggil krama sané ngindikang sentana.
- (2) Indik Sentana, Désa Pakraman Piun, ngamanggehang uger-uger jagat minakadi kawicaksanan sang maraga Guru Wisésa, kaanutang ring drestan Désa.
- (3) Sentana wénten kalih soroh, sané kaucap pratisentana miwah sentana peperasan.
- (4) Pratisentana inggih punika sentana sané metu saking pawiwahan kapatut.
- (5) Pradé pawiwahané tan ngwetuang sentana, kéngin ngedih sentana antuk upasaksi sekala niskala sané kawastanin sentana peperasan.
- (6) Ngembasang sentana nénten sangkaning pawiwahan, mangda tan kantun kawastanin bebinjat utawi astra, patut kamanggala antuk panyangaskara.

- (7) Sentana rajeg inggih punika pratisentana wadon sané kamanggehang dados purusa, tur ri sampun nglaksanayang pawiwahan, patut ngedih anak lanang sané kabawos pawiwahan nyeburin.
- (8) Sapasira ugi krama pacang ngedih sentana patut masadok ring Bendesa Adat, sanistané asasih sadéréng pamerasan.
- (9) Sang kapatut peras anggé sentana, sakadi ring sor :
 - ha. Jadma maagama Hindu;
 - na. Kulawarga saking purusa, pradé tan wénten kéngin saking wadon, yening taler tan wénten, wahu kéngin sakama-kama (sakita kayun);
 - ca. Kautamayang saking waris kapurusa;
 - ra. Sinalih tunggil mawit saking kulawarga tunggal sanggah utawi mrajan, paibon lan dadia, utawi ngambil anak tiyos sakéwanten sang maagama Hindu.

Palet 4

Indik Warisan

Pawos 41

- (1) Prajuru Désa minakadi Prajuru Banjar Pakraman, wenang sareng mawosin miwah niténin yan wénten sinalih tunggil krama ngindikang warisan.
- (2) Indik Warisan, Désa Pakraman Piun, ngamanggehang uger-uger jagat minakadi kawicaksanan sang maraga Guru Wisésa, kaanutang ring drestan désa, sané kapikukuh antuk pararem.
- (3) Warisan inggih punika artha brana saha ayah-ayahan ngupadi sukerta sekala niskala saking kaluhurannya marep ring turunannya.
- (4) Ahli waris, luwiré :

- ha. Pratisentana purusa;
 - na. Pratisentana wadon (sentana rajeg);
 - ca. Pratisentana peperasan lanang / wadon.
- (5) Pradé tan wénten sakadi inucap ring ajeng, kang kasinanggeh ahli waris :
- ha. Turunan purusa pernah ngunggahang makadi rerama lanang, pekak salanturnyané, rerama dimisan, rerama dimindon.
 - na. Turunan purusa pernah ka samping, makadi kaponakan, kaponakan dimisan miwah kaponakan dimindon.
- (6) Swadharmaning ahli waris, patut :
- ha. Nerima saha nguwasayang tetamian keluhurannya, makadi ngrempon sanggah, mrajan, saha pangupakarannya miwah ayah-ayahan pawaris.
 - na. Ngabénang pawaris saha nglanturang uapacara-upacara pitra yajnyannya.
 - ca. Nahurin utang-utang pawaris anut panglokika.

ŚAṢṬHAS SARGAH

SUKERTAN TATA PALEMAHAN

Palet 1

Karang, Tegal, lan Carik.

Pawos 42

- (1) Krama Desa sané ngamong karang pumahan ngraga, patut ngwatesin karangnya sowang- sowang antuk pagehan / turus utawi témbok, mangda pakantenannya sri.
- (2) Watesé sané atep patut kapiara olih krama sané magenah ring tebén, sané kawastanin magaleng kaluan.

- (3) Pradé karasayang pagehan / turus inucap nglikadin, yan pada arsa panyandingé, watesé kéngin nganggén pinget utawi pracihna pal saking Agraria, sakéwanten kasaksi antuk Prajuru Désa / Banjar Pakraman.
- (4) Pradé wénten karang kabebeng, mangda kautsahayang wénten pamesuannya sané pastika.

Pawos 43

- (1) Sinalih tunggil Krama Désa / Banjar Pakraman, nénten kalugra :
 - ha. Ngalah-alah margi, Karang Désa, tegal ayahan désa, tegal / carik krama liyan, lan sakancan punika;
 - na. Ngalah-alah tegak kahyangan, sétra lan sakancan tegak sané sinanggeh suci.
- (2) Pradé wénten mamurug kecapé ring ajeng, sang mamurug, patut ngwaliang tanah inucap, tur sang ngalah-alah tegak suci, tiosan ring ngwaliang tanah tegak suci inucap, taler patut karuntutin antuk déwa danda miwah artha danda, sané kasulurang manut Pararem.

Palet 2

Indik Pepayonan

Pawos 44

- (1) Ngawit nandur pepayonan minakadi tanem tuwuh, patut adepa agung ngajeroang saking wates; pepayonan minakadi tanem tuwuh sané jantos ngliwat wates, wenang kasepatgantungin.

- (2) Pepayonan sané ngungkulin mawastu mayanin ka pisaga, sang nruwénang pepayonan inucap patut kawara tur kairing mapiguman antuk sang rumasa katetehan, bilih-bilih sang nruwénang arsa ngrebah utawi notor wit pepayonané punika.
- (3) Pradéné sampun kawara taler tan wénten utsahan sang nruwénang, sang rumasa katetehan wenang masadok ring Prajuru, tur risampuné kaparitas kandugi wénten lelugrahan Prajuru, wahu wit pepayonané punika kéngin karebah, sakéwanten panukun patin wit pepayonané punika patut katahur olih sang rumasa katetehan manut panglokikan sang nepasin, tur wit pepayonané sané karebah punika, kasukserah ring sang nruwénang.
- (4) Yan hana pepayonan mentik ring telenging bebaledané utawi wates karang, taruné punika patut kadruwénang sareng kalih.
- (5) Sang patut keni pamidanda panyangaskara saha prabéa manut pararem, marep ring wewangunan sang karubuhan, luwiré :
 - ha. sang nruwénang wit pepayonan sané sinanggeh mayanin, pradé pungkut padidi tur ngrubuhin wewangunan krama tiosan;
 - na. sang notor, monggol utawi ngrebah taru, tur ngrubuhin wewangunan krama tiosan.
- (6) Krama Désa patut ngamanggehang kawredian tanem tuwuh sané ngawinang Désané asri tur lestari sané kawastanin Bhutahita, sané matesges kalestarian lingkungan hidup.

Palet 3

Indik Wewangunan

Pawos 45

- (1) Nangken ngwangun, sowang-sowang krama patut :

- ha. masadok ring Prajuru, pamekas marep ring wewangunan sané mapanyaitan minakadi menengin wates;
 - na. nganggé Aṣṭa Bhūmi miwah gegulak Aṣṭa Kośali, sanistannya manut ring patitisé ka niskala.
- (2) Pradé wewangunané jantos nyayubin ka pisaga, bilih-bilih témboké ring telenging wates, risampuné kawara tur kairing mapiguman taler tan wénten utsahan sang nruwénang, kangkat kasadokang ring Prajuru; sasampuné kaparitas tur wénten lelugrahan Prajuru, sang nruwénang wewangunan wenang keni danda manut Pararem, tur témbok inucap patut kagubar olih sang nruwénang, sanistannya mangda kakaryanang abangan.

Palet 4

Indik Wewalungan

Pawos 46

- (1) Sahanan warga désa sané miara wewalungan : bawi, banténg lan sakancan punika, mangda sayaga niténin negul minakadi nglogor wewalungannya, mangda nénten ngrusak karang utawi pabianan krama tiosan, bilih-bilih jantos ngranjing ngletehin kahyangan.
- (2) Pradé wénten wewalungan malumbar utawi ngeléb tur ngrusak karang utawi pabianan krama séwosan, risampuné kawara taler nénten wénten utsahan sang nruwénang, yan wewalungan punika malih ngrusak karang utawi pabianan krama séwosan, wewalungan punika kéngin kataban, tur sang nruwénang wenang katibakin danda ngwaliang panukun wit tetandurané sané karusak, saha nahur panebas pepiaran tetabanan, manut panglokikan Prajuru Désa / Banjar Pakraman.

- (3) Pradé wénten wewalungan ngranjing jantos ngletehin genah suci, minakadi kahyangan, pamrajan lan sakancan punika, risampuné kaparitats antuk Prajuru, sang nruwénang wewalungan inucap wenang keni déwa danda lan artha danda, agung alitipun manut kecap sastra agama, sané kapikukuh antuk Krama Désa / Krama Banjar Pakraman.
- (4) Krama Désa patut nyerayanin wewalungan miwah sarwa prani, tan kapatutang mademang paksi, nuba ulam lan sakancan punika, pinaka sinalih tunggil utsahan Krama Désa ngardi Bhutahita.
- (5) Sang mamurug kecapé ring ajeng, wenang keni danda manut Pararem.

Palet 5

Indik B h a y a

Pawos 47

- (1) Bacakan bhaya luwuré : jiwabhaya, arthabhaya, agnibhaya, toyabhaya, lindubhaya, lan sakancan punika sané ketahipun kawastanin pancabhaya.
- (2) Sinalih tunggil krama sané manggihin prasihna pastika wénten sahanan pancabhaya, patut digelis nepak kulkul tengeran kapancabhayan, tur digelis masadok ring Prajuru.
- (3) Pradé désané kahanan jiwabhaya, Krama Désané patut ngaturang upacara pamahayun désa manut kecap sastra agama sané kapikukuh antuk krama, tur sang ngwetuang jiwabhaya, katur ring sang ngawawenang.
- (4) Pradé wénten jadma mamunyah, mamisuh utawi nguman-uman jadma tiyosan ring wewengkon Désa Pakraman, patut kakeninin pamidanda manut pararem.

Pawos 48

- (1) Sinalih tunggil krama sané manggihin prasihna pastika wéntené arthabhaya (kamalingan), patut digelis nepak kulkul tengeran pamitulung manut pawos 15 (3) utawi pawos 16 (1); sang kamalingan patut digelis atur supéksa ring Prajuru; sang kacihnan ngamaling, katur ring sang ngawawenang, maweweh malih patut keni déwa danda lan artha danda manut Pararem, yan ipun ngamaling barang druwén désa sané sinanggeh suci.
- (2) Sowang-sowang Krama Désa tan kapatutang mapailonan ring dusta; sang kacihnan mapailonan ring dusta patut katibakin danda kadi dandaning maling, sané kasulurang manut Pararem.
- (3) Indik ngrereh reramon minakadi daun kelapa, ron, miwah sané séwosan ring pabianan krama tiosan ri kenjekan suwung, kasulurang manut Pararem.
- (4) Indik ngranjingin pakubon utawi pakarangan krama séwosan rikala suwung, mawastu raris sang maderbé pakubon utawi pakarangan punika kaicalan, kasulurang manut Pararem.
- (5) Indik ngranjingin pakubon utawi pakarangan krama séwosan rikala suwung riantukan wénten pisarat sané mabuat minakadi mapangarah miwah kabuatan sané liyanan, kasulurang manut Pararem.

SAPTAMAS SARGAH

WICARA LAN PAMIDANDA

Palet 1

Indik Wicara

Pawos 49

- (1) Sané wenang mawosin wicara ring wewengkon Désa Pakraman Piun, inggih punika Prajuru Désa Pakraman Piun.
- (2) Pradé sang mawicara tan cumpu ring Pamutus Prajuru Desa Pakraman, kéngin nunasang ring Sang Rumawos utawi Pengadilan Negeri.
- (3) Sahanan wicara sané mawit saking kacorahan sakaluwuré sané sinanggeh nungkasin daging Awig-awig, Pasuara miwah Pararem Désa / Banjar Pakraman, patut digelis kabawosin olih Prajuru, nénten nyantos pasadok malih.
- (4) Sajaba wicara sakadi ring ajeng, patut nyantosin pasadok sang nunas bawos.
- (5) Panepasé mangda pastika nyantenang iwang patut malarapan Tripramana, inggih punika : saksi, likita, bukti, tur panepasé tan maren nepék ring Catur Dresta.

Palet 2

Indik Pamidanda.

Pawos 50

- (1) Désa Pakraman Piun, wenang nibakang pamidanda ring Warga Désa / Banjar sané sisip.
- (2) Tetibak pamidanda inucap ring ajeng, kalaksanayang olih Prajuru.
- (3) Bacakan pamidanda, luwuré :
ha. ayahan panukun kasisipan;
na. artha danda saha panikelnya, miwah panikel paturunan;

- ca. karampag;
- ra. kanorayang;
- ka. panyangaskara.

- (4) Pamidanda sané katiwakang patut masor singgih, manut kasisipan.
- (5) Jinah utawi arthabrana pamidanda, ngranjing dados druwen Désa/Banjar Pakraman.

Pawos 51

- (1) Krama sané langkungan ring tigang paruman nglantur nénten nahur paturunan miwah dedandan, wenang karampag.
- (2) Tetibak pangrampagagan, nganutin tatacara sakadi ring sor puniki :
 - ha. Kalaksanayang olih Prajuru, kasarengin antuk krama pinih akéh tigang diri, maka saksi;
 - na. Sang ngrampag patut madarsana rikala ngambil barang minakadi nyawénin tanem tuwuh, sané ageng pangargannyané manut ring utang sang karampag;
 - ca. Prajuru patut miteketang mangda barang-barang sané karampag punika digelis katebus masenger awuku, tur ring rahinané kaping kutus pacang kalélang utawi kaadol ring ajeng Krama Désa Pakraman;
 - ra. Tan kengin ngrampag saluwiring barang sané patut inggilang manut sastra agama, miwah mademang pangupajiwan sang karampag.

Pawos 52

- (1) Pradé sang pacang karampag mialangin pamargin pangrampagan inucap, mawastu sampun tan nganutin linging Awig-awig, krama inucap wenang kanorayang.
- (2) Yan krama inucap manggeh piwal yadiastun sajeroning makudang-kudang paruman sampun kawéhin patinget sakéwanten manggeh piwal, tan wénten pamargi séwos, sajawaning krama inucap kawusanang makrama Désa Desa.

(3) Pangrampagan inucap ring ajeng kabawos buntas, risampun sang keni pangrampagan punika :

ha. Nunas geng rena sinampura ring ajeng Krama Désa/Banjar Pakraman, riantukan piwal ring pasubaya sané pecak sampun kararemin;

na. Nahur pangangan panguwak pasubaya sadaweg pacang karampag, kadulurin antuk prayascitta.

AṢṬAMAS SARGAH

NGUWAH-UWUHHIN AWIG-AWIG

Pawos 53

(1) Nguwah-uwuhin Awig-awig Désa Pakraman puniki, wantah kengin kalaksanayang antuk Paruman Krama Désa.

(2) Pakarsané nguwah-uwuhin punika, mangda mawit saking pakarsan Krama Désa, yadiastun kamedalang antuk sinalih tunggil Prajuru, utawi sinarengan.

Pawos 54

(1) Sakaluwiring indik sané sampun wénten sadéréng awig-awig puniki kasurat, mangda kaanutang ring sadaging awig-awig puniki.

(2) Sakaluwir sané durung kasurat sajeroning awig-awig puniki, menawi kangkat kanggén mitegepin awig-awig puniki, pacang kasurat jeroning Pararem.

NAWAMAS SARGAH

SAMĀPTA


Pawos 55

- (1) Awig-awig puniki kawastanin Awig-awig Désa Pakraman Piun.
- (2) Awig-awig puniki kamargiang ngawit saking kaingkupin utawi kararemin.

Pawos 56

- (1) Awig-awig puniki kararemin duk rahina Sukra, Pon, wuku Tambir, pananggal ping 15 Sasih Kadasa, Sakawarsa 1930, tanggal 21 Maret 2008, magenah ring Balé Banjar Adat Piun.
- (2) Awig-awig puniki kalinggatanganin antuk Bendesa Adat miwah olih sang ngawawenang manut kawenangannya sowang-sowang, tur kapikukuh antuk Murdhaning Pamikukuh : Bupati Tabanan.
- (3) Luwir sang nglinggatanganin :

ha. Kapratama : Prajuru Désa Pakraman :



na. Kaping kalih : Prajuru Désa Dinas maka saksi :

1). Keluhan Banjar Dinas Piun



I MADE KIRIM ARSA


2). Perbekel Desa Perean Kangin,



I WAYAN BAGUS SUKARMA


ca. Kaping tiga : Kawikanin olih :

1). Ketua Majelis Alit Désa Pakraman
Kecamatan Baturiti,



DRS. I WAYAN JELADA

2). Ketua PHDI Kecamatan Baturiti,



DRS. I WAYAN PURNAYASA

3). Camat Baturiti,





A. A. GDE DALEM TRISNA N. S. Sos.

ra. Kaping pat : Kapikukuh olih :

1) Ketua Majelis Madya Désa Pakraman,
Kabupatén Tabanan,

DRS AGUSTI KETUT SUARTANAYASA.

2) Ketua PHDI
Kabupatén Tabanan,

dr. I WAYAN ARWATA

3) Kepala Kantor Département Agama
Kabupatén Tabanan,

DRS NYOMAN MANDIASA, M. Si.

MURDHANING PAMIKUKUH
BUPATI TABANAN,

N. ADI WIRYATAMA, S. Sos, M. Si

Mengetahui dan telah dicatatkan :

Tanggal : 13 MEI 2009
Reg. Nomor : 189/87/HK & HAM



LEPIHAN :

TETINASAN NYĀSA LAN SASANTI DESA PAKRAMAN PIUN

(1) Sibeh Bucu Lima, mateses :

- ha. Désa Pakraman Piun, mapikukuh antuk Pancasila, Dasar miwah Darsanan Jagat Republik Indonesia.
- na. Sajeroning nyungkemin Agama Hindu, Krama Desa Pakraman Piun, mapikukuh antuk Panca Śraddhā.

(2) Swastika jeroning Padma Asta Dala :

- ha. Swastika, mateses : Krama Desa Pakraman Piun, nyungkemin miwah nginggilang Agama Hindu.
- na. Padma Asta Dala, mateses : Krama Desa Pakraman Piun, misinggihang Asta Aiswaryan Ida Sang Hyang Widhi : Aṇimā, Laghimā, Mahimā, Prāpti, Prakāmya, Īsitwa, Waśitwa, miwah Yatrakāmāwasayitwa. Tiyo ring punika, sajeroning ngupadi patitis Désa Pakraman Piun, Prajuru Désa Pakraman Piun, mapagamel antuk Aṣṭa Brata : Indra Brata, Sūrya Brata, Candra Brata, Yama Brata, Bāyu Brata, Kuwéra Brata, Agni Brata, miwah Baruṇa Brata.

(3) Keris, mateses : Nyihnayang kawibhawan.

(4) Gunung, mateses : Maka cihna wit pangan kinum lan sakahuripan sang manumadi.